

Famia Ling ta lansa e buki:

Ling Legacy a journey of Family, Food and One Happy Island



Na Papiamento Restaurant den un ambiente ideal, cu solo bahando, biento fresco suplando despues cu un poco awasero a cay riba Aruba, cu famia Ling hunto cu un grupo chikito di invitado a reuni pa lansa e buki; Ling legacy a journey of family, food and one happy island.

Sharlene Starke yiu muher di Yolanda Ling q.e.p.d. a conta di e origen di e buki y di e fundacion; Jordan Ling Foundation na cual tur fondo recauda por medio di benta di e buki lo bay.

E idea pa skirbi y publica e buki a nace cerca mi tanta Sra. Ingrid Ling casa di mi tio Clifton. E intencion tabata prome pa haci e un publicacion priva pa famia, pa e keda como un recuerdo pa tur miembro di famia cu ta of tabata parti di e legado di e famia Ling, pues un family book,” asina Sharlene a conta.

Sin embargo na 2015 mientras cu Sra. Ingrid tabata bezig cu e draft, e famia a ser enfrenta cu un dolor devastador. Su primo Jordan, you di Clifton y Ingrid lamentablemente a tuma su mesun bida a consecuencia di su sufrimento di deficiencia mental. Asina na 2016 a lanta “The Jordan Ling Foundation” pa promove actividadnan relaciona cu Salud Mental. E meta principal ta pa yuda mas tanto posibel promove cuidu di personanan cu ta sufri di Salud Mental aki na Aruba.

Despues Sr. Clifton Ling kende hunto cu su rumannan a tuma over e negoshi di su mayornan a conta di e historia di yegada di su famia for di China na Aruba na 1930. Tabata durante di e decada 1920 cu China tabata un republica nobo, despues di 2000 aña di dominio imperial. E pais tabata enfrentando enorme retonan cu nan economia, politica y bida social. China a keda devasta pa un guerra civil entre Kum Ming Tong (KMT) encabesa pa Chang Kai Shek y e Partido comunista Chines (CCP) bou mando di Mao Zhe Dong, cual doctrina a prevalece te cu awe. Segun e censo di e tempo ey China tabata conta cu un poblacion di solamente mei million habitante. Den e decada ey China a conoce un periodo di hambruna causa pa caos politico y un segura inmenso. “Mi Papa a nace den e aldea chiquito di Leelong cu awe ta un bario di e metropolis Shenzhen, e ciudad fronteriso entre Hong Kong y China. Siendo e yiu mayor di un famia di 10 yiu e tabata esun cu a wordo encarga pa haci e biahe pa exterior cu e speranza pa un logro miho futuro, asina el a descubri Aruba.

Sr. Clifton Ling a sigui conta durante di su discurso cu e caminda pa realisa e buki tabata basta turbulento pa motibo di e tragedia di nan yiu homber menor Jordan, pa kende nan ta dedica e obra di e buki y tambe pa e fundacion bou su number. Un danki ta bay na nos yiu homber Dustin y su grupo di amistad di Caribe Hulandes biba na New York - Big Apple cu a establece contacto cu e editor y publicista Willy Wong cu tabata tin gran conocimiento di e material y acceso na e archivonan universitario den e region. Asina nos por a compila e historia di mi grandi nan, e biah, e documentonan y potretnan cu ta synchroniza cu e texto skirbi den e buki. E ta simplemente un storia di un inmigrante cu kier a busca su futuro sin conocimiento kico esaki lo trece den un mundo nobo aki na otro banda di e lama inmenso.

Un danki special ta bay na tur personanan y instancianan cu a contribui den cualkier forma cu por a conduci den e logro aki awe. Manera mi a menciona prome, e buki ta dedica na JLF y e fondonan recauda aki ta bay pa e fundacion. E prome ehemplar di e buki a ser entrega na director di Archivo Nacional Sr. Raymond Hernandez, e bukinan lo ta obtenibel den librerianan local. Nos ta spera cu e comunidad di Aruba les’e y gosa di dje!